

CONCORS DI IDEIS

Cuatri Ruedis pe Sigurece – Stîi di vite, stîi di vuide

JENTRADE

La Prefeture – U.T.G. di Udin, in colaborazion cun Uffici Scolastic Ambit teritoriâl di Udin, Consulte provinciâl dai Students di Udin, Sezion di Polizie Stradâl di Udin, Fondazione Friuli, Rotary Club di Udin, Automobile Club di Udin, ARLeF e Societât TPL FVJ di Udin, tacant dal an scolastic in cors e organize il progjet di educazion ae sigurece stradâl e ae legalitât *Cuatri Ruedis pe Sigurece – Stîi di vite, stîi di vuide*, che al cjape dentri ancje un concurs di ideis.

FINALITÂTS

Il Concors di ideis al vûl promovi e miorâ la culture de prevenzion e de sigurece stradâl, interpretade in clâf coerente cul sottitâl dal progjet *stîi di vite, stîi di vuide*.

Il Concors al previôt la produzion di elaborâts e di oparis che a sedin espression di creativitât e che a sburtin ae riflession – in aderenca cui principis democratics e di legalitât, che su chei e à di fondâsi la convivenca civîl – su lis tematicis de sigurece stradâl (cognossince des normis; rispjet des regulis, di se e di chei altris; acuisizion di compuartaments corets su la strade, ispirâts ae culture de legalitât; cussience des propriis azions; assunzion e ricognossiments de responsabilitât intes propriis sieltis e intes propriis azions; riflession su lis consecuencis dal propri agjê; autonomie intes capacitâts di judizi; acuisizion di stîi sans di vite; potenziament dal disvilup des abilitâts di vite cu la acuisizion des formis di gjestion dal stress e des emozions, des tecnicis di *problem solving* e dal spirt critic funzionâl ae gjestion di se su la strade).

DESTINATARIS

La edizion dal progjet e dal Concors si disvilupe in trê anualitâts, ma pal an scolastic in cors il Concors di ideis al è viert a ducj i students des classis tiercis e cuartis des scuelis secundariis di II grât de provincie di Udin.

TIPOLOGJIE DAI ELABORÂTS

Par lassâ grant spazi ae creativitât dai students, il Concors al previôt chestis categoriis: grafiche, fotografie, videoclip e musiche.

1. Categorie grafiche: e previôt la realizazion di une locandine grafiche o manifest a colôrs di dimensions 50x70 cm o 30x42 cm. L'elaborât al varà di jessi consegnât in formât jpeg e pdf e se pussibil ancje in formât vetoriâl; al varà, cun di plui, di podê jessi ingrandît o ridusût cence pierdi cualitât grafiche, clarece e eficacitât comunicative.
2. Categorie fotografie: e previôt la realizazion di une fotografie a colôrs di dimensions 50x70 cm o 30x42 cm. L'elaborât al varà di jessi consegnât in formât jpeg e pdf e al varà di podê jessi ingrandît o ridusût cence pierdi cualitât grafiche, clarece e eficacitât comunicative.
3. Categorie videoclip: e previôt la realizazion di un spot video de durade massime, par no jessi escludût dal concurs, di 1'00", comprendûts i titui di viertidure e di code. Il video al varà di jessi presentât in formât avi o mpg, miôr se in version Full HD (1920x1080) cuntun rapuart di aspiet di 16:9.
4. Categorie musiche: e previôt la realizazion di une composizion musicâl curte, che e duri al massim 3'00".

Par favorî il disvilup de lenghe locâl e par permeti la massime libertât espressive ai students, intai elaborâts e podarà jessi doprade la lenghe furlane.

TIERMINS DI PARTECIPAZION

I students che a vuelin partecipâ al Concors a varan di fâ rivâ i elaborâts su supuart digjitâl (CD o clavute) ae Prefeture - U.T.G. di Udin, vie Piave n. 16 dentri des **oris 12.00 dai 31 di Mai dal 2022.**

I students a podaran partecipâ in grup o ognidun par so cont.

Ducj chei che a presentaran domande intal tiermin previodût, a saran ametûts al concors.

Ogni elaborât al varà di jessi consegnât intune buste sierade cun scrit par difûr “1ⁿ CONCORS DI IDEIS CUATRI RUEDIS PE SIGURECE”, il nominatîf dal participant/dai participants, la classe, l'Istitût scolastic di apartignince e la categorie sielzude.

Dentri de buste a varan di jessi zontâts, firmâts e compilâts in maniere complete, chescj modei:

- domande di iscrizion (zonte A);
- liberatorie (zonte B);
- at di cession (zonte C);
- une relazion curte su lis motivazions de sielte dal messaç, che e meti in risalt il *target* di riferiment (max 200 caratars).

Intal câs di partecipazion di grups, al varà di jessi compilât un model par ogni component dal grup. No saran cjàpâts in exam projets rivâts dopo de scjadince dal tiermin o, dut câs, no conformis a ce che al è indicât in chest bant.

Ogni participant al è tignût a sigurâsi che il materiâl al rivi a destinazion.

CUNDIZIONS DI PARTECIPAZION E/O ESCLUSION. RESPONSABILITÂT DAL AUTÔR

La partecipazion al Concors e je gratuite e risiervade dome ai students.

I professioniscj e cui che al opere in maniere professionâl intal cjamp de grafiche / fotografie / cinematografie / musiche a saran escludûts in maniere automatiche.

Ogni participant al è responsabil unic dal ogjet dal so elaborât, duncje si impegne a escludi ogni responsabilitât dai organizadôrs dal Proget a pet di tierçs.

In particolâr, al declare di jessi unic autôr de opere mandade e al garantîs che cheste e je il risultât esclusîf dal propri inzen, che e je originâl, inedite, e no lesive di dirîts di tierçs.

I elaborâts che a previodin la presince di personis ricognossibilis a àn di jessi par fuarce furnîts di une liberatorie ae riprese e ae publicazion, firmade dai sogjets interessâts, o a vignaran escludûts dal concors. Ogni informazion di caratar personâl e sarà doprade intal rispiet des normis a tutele de privacy. A saran esclududis lis oparis no originâls, lesivis de decence comune, che a contegnin riferiments publicitaris, politics o che a fasin riferiment al ambit religjôs, e chês che a vedin za vinçût altris concors. La Jurie e podarà ancje escludi, a so judizi insindicabile, chei che a vessin di vê un comportament no coerent cuntune competizion leâl.

JURIE

I elaborâts a saran valutâts di une Comission tecniche valutative coordinate dal Prefet e formade di esperts dal setôr e di un rapresentant par ogni Sogjet organizadôr.

Il miôr elaborât in lenghe furlane al sarà sielzût in acuardi cu la ARLeF.

La Jurie e individuarà i miôr elaborâts su la fonde di chescj criteris:

- capacitât di interpretazion dal teme;
- impat dal messaç mandât;
- originalitât e creativitât;
- cualitât tecniche.

Il judizi di merit de Comission esaminadore al è incontestabil.

Pes oparis vincidoris, la Comission e formularà la motivazion de assegnazion dal premi.

ASSEGNAZION PREMIS

A vignaran premiâts i miôr prins cuatri elaborâts in lenghe taliane, di cualsisedi categorie, in plui dai Istitûts di divignince dai students che ju àn realizâts.

I impuarts stanziâts a son di 3.000 euros pai miôr prins cuatri elaborâts e 1.500 euros pai Istitûts di divignince dai prins cuatri classificâts.

Al vignarà premiât ancje un elaborât in lenghe furlane, sielzût tra chei che no risultin za vincidôrs, che par chel al è previodût un premi dal valôr di 500 euros, intant che al Istitût di divignince dai students che lu àn realizât i larà un premi dal valôr di 250 euros.

I premis parsore a vignaran distribuîts cu lis modalitâts ripuartadis in chest prospet:

	Elaborâts in lenghe taliane				Elaborâts in lenghe furlane
	1 ⁿ Premi	2 ^t Premi	3 ^e Premi	4 ^t Premi	1 ⁿ Premi
Premi pai autôrs dal elaborât	€ 1.200,00	€ 900,00	€ 600,00	€ 300,00	€ 500
Premi pai Istitûts scolastics dai vincidôrs	€ 600,00	€ 450,00	€ 300,00	€ 150,00	€ 250

A ogni Istitût formât di plui sedis al pues jessi assegnât al massim un premi.

I impuarts che a vignaran corispuindûts a titul di premialitât a podaran jessi doprâts par ativitât didatichis e formativis.

A ducj i participants ur vignarà consegnât un gadget e un atestât di partecipazion.

La consegne dai premis si fasarà intant di une cerimonie di pueste.

Su la fonde dal art. 6 D.P.R. n. 430 dai 26.10.2001, chest concurs nol à bisugne di autorizazion ministeriâl.

DIRIT DI ÛS E PROPRIETÂT DAI ELABORÂTS

Inviant i elaborâts, l'autôr al rinunzie / i autôrs a rinunziin a ogni dirit di proprietât inteletuâl, trasferint ae organizazion la proprietât dai stes.

La cession dai dirits di ùs e di privative al compuarte la autorizazion al ùs dal materiâl produsût de bande de Organizazion e al impliche la concession di une licence di ùs, ilimitade di un pont di viste temporâl, a pro de Organizazion, dal materiâl produsût, e e je comprensive - a titul dome esemplificatîf - di chescj dirits e facultâts: dirit di publicazion, dirit di riproduzion cun e su cualsisedi supuart audiovisîf, dirit di trascrizion, montaç, adament, elaborazion e/o riproduzion, dirit di comunicazion e distribuzion al public o ben in ambits e ambients vierts al public cence finalitât di vuadagn, dirit di publicazion in formât eletronic midiant de rêta publiche, dai intranets istituzionâi, dai social networks, di mostris e catalics.

I autôrs a varan dirit ae citazion dal propri non tant che autôrs de opare in ocasion di dutis lis formis di ùs. Al è sotintindût che cun chest bant la organizazion no si cjape nissun oblic di doprâ/riprodusi/esponi lis oparis che a àn partecipât ae selezion in cuistion.

Inviant i elaborâts, il participant al soleva i organizadôrs di cualsisedi richieste fate di tierçs in relacion ae titularitât dai dirits di autôr e ae violazion dai dirits des personis rapresentadis, e di ogni altri dirit conetût aes oparis mandadis.

Il materiâl mandât nol sarà tornât e al restarà proprietât de organizazion dal concurs.

DISPOSIZIONS FINÂLS

Presentant la domande, i participants a acetin cence cundizions dutis lis normis di chest regolament.

La organizazion dal Concors si riserve il dirit di cambiâ e/o di abolî in ogni moment lis cundizions e lis proceduris di chest concurs prime de date de sô conclusion; in chest câs, e proviodarà a dâ la juste comunicazion. La organizazion no si cjape la responsabilitât par cualsisedi probleme o circumstance che e puedi inibî il davuelziment o la partecipazion a chest concurs.

TRATAMENT DAI DÂTS/PRIVACY

Su la fonde di ce che al è fissât de leç 196/03 e dal GDPR - *General Data Protection Regulation* - Regolament UE 2016/679, la partecipazion al concors e compuarte, di bande dal autôr, la autorizazion al tratament, sedi cun mieçs informatics che no, dai dâts personai e al lôr ûs de bande de Organizazion, pai adempiments dal concors.

Udin, ai 18 di Fevrâr dal 2022.